

Date – 19/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizoram Chemist & Druggist Association (MCDA) chuan ram puma damdawi zawrhna dawr naktuk an khar tur an zawm dawn a, FDA chuan hemi avanga mipuite chiai lo turin a chah.
2. Adviser to Chief Minister (Handholding) Dr. KC Lalmalsawmzauvan kuminah sawthing hralhna a awm har avangin kuthnathawktu ten harsatna an tawk a ti.
3. Uttarakhand Chief Minister hlui leh BJP hruaitu senior Bhuvan Chandra Khanduri chu vawiin khan a thi.
4. Prime Minister Narendra Modia chuan vawiin khan Idnia-Nordic Summit wawi 3-na Oslo khawpuia neihah a tel.



MCDA PRESS MEET

Mizoram Chemist & Druggist Association (MCDA) chuan naktuka ram pumah damdawi zawrhna dawr an khar tur an zawm dawn a, online a damdawi chah inkaihhraina mumal awm lo vanga dawr khar hi Mizoramah pawh an thlawp an ti

MCDA chuan dan awm mumal lo chung a Online hmanga damdawi zawrh chu mipui him nan a thil pawt thei a nih thu vawiin khan Aizawl Press Club-ah thuthar thehdarh tute hmaah an sawi a, an President Pu Lalhrualiana chuan Online a damdawi zawrh hrim hrim an do lo tih a sawi a, Online a damdawi zawrh leh hralh chu Drugs and Cosmetics Act 1940 leh Rules 1945 kan hman lai mek hnuaiah chuan dan kalh a ni, a ti.

MCDA hruaitute chuan Damdawi chu thawmhnaw leh bungraw dang nen a inang lo tih an sawi a, License hmangin inkaihhraina fel takin an zuar tih an sawi a. Tunlai hian Doctor lehkha lem siam in online a damdawi chah te an awm tih sawiin, Ruihhlo chah te an awm a, damdawi dang nen chahin damdawi pangngai karah an zep a, chumi chu a lo thlen zel loh kan duh a ni, an ti.

Damdawi zuartute chuan an mahni tanghma hai ringawt an ni bik lo tih sawiin, inkaihhraina dan leh hria tha tak awm se an duh tih an sawi a. Thalai tam tak tibuitu damdawi karah ruihhlo an chah chu tih tawp theih an duh thu an sawi bawk a ni.

All India Organization of Chemists & Druggists chuan naktuk May ni 20 hian ram pumah damdawi zawrhna dawr an khar dawn a, online a damdawi chah inkaihhraina mumal awm lo vanga dawr khar hi Mizoramah pawh thlawp an tum a. Dawr khar tur hian Damdawi Ina damdawi zawrhna erawh a huam dawn lo a ni.

<><><>

FDA

Hetihlai hian, Directorate of Health Services Controlling & Licensing Authority chuan All India Organisation of Chemists & Druggists (AIOCD) in rampum huap Online pharmacy dodal nan leh India rama e-pharmacy pawm a nih loh nan damdawi dawr zawng zawng kharin bandh a huaihawt turah mipuite chiai lo turin a chah.

Naktukah damdawi dawr khar tum ni mahse, Sawrkar leh Private hospital pharmacy-te hawn a nih dawn avangin hengahte hian mamawh a lam theih reng dawn a. FDA thuchhuah chuan, Damdawi dawr khar avanga buaina awm thei pumpelth nan Natna benvawn zunthlum, thisen sang, asthma, cancer nei chuan bandh hma ngeiin mahni damdawi mamawh lo inlam lawk ni se a ti a.

Emergency-a mamawh theih insulin, inhaler, life-saving drugs leh naupang damdawi mamawh lo ngaihtuah lawk ni bawk se.

Nikhat chauh bandh a nih dawn avangin mamawh tawh bak a chuang aliamin eng damdawi mah lei khawl loh ni se an tih bakah accident leh rikrum thil dang thleng a awmin, hospital hnai ber biak pawh thuai ni se, Damdawi zuarte pawh dawr kharin bandh zawm mah se, emergency thila damdawi mamawh a awmin dawr hawnsak hram hram tura ngen leh beisei an ni.

FDA Officer-ten an bial enkawl chhungah bandh avanga damdawi mamawh hmuh zawh loh a awm loh nan hma an la vek dawn tih FDA thuchhuah chuan a tarlang bawk a ni.

<><><>

IRRIGATION MINISTER

Irrigation & Water Resources Minister Pu PC Vanlaruatan vawiin khan Brahmputra Board-High-Powered Review Board Meeting vawi 14-na leh NERIWALM Governing Body Meeting vawi 6-na a hman pui.

Guwahati-a hun hmanah hian Pu PC Vanlalruata chuan, Mizoram leh tlangram state dangte'n tui chunghang harsatna bik an neihte chu sawiin, ram pianken, sik leh sa inthlak danglam, ruahtui tlak dan danglam, leimin leh tuihna kangin harasatna nasa tak a thlen chho mek a ni, a ti.

Minister chuan Serchhip District-a Mat Valley Integrated Water Resources Management and Climate Resilient Irrigation Project, cheng vaibelchhe 274.25 man DPR chu Brahmaputra Board-ah thehluh a nih tawh thu a sawi a. He project hi irrigation mai bakah, kawlphehtha siam chhuah te, Mat tuikhuah tura luanglut tura ruahtui dawnna tihchangtlun te, eco-tourism leh he biala eizawna ngeth zawk thlen thei tura duan a ni.

North Eastern Regional Institute of Water and Land Management (NERIWALM) Governing Body Meeting-ah Minister hian Mizoram tana Springshed enkawl dan te, ruahtui khawlkhawm te, climate-resilient irrigation te, leh scientific water resources planning te Mizoram tana ruahmanna siam a pawimawh thu a sawi bawk.

Minister hian NERIWALM-in RIPANS, Aizawl tana tui lakkhawmna tur ruahmanna a buatsaih chu tha taka hma a sawn a, thawhhona tha zawk neih theihna kawng a hawn ngei a beisei thu a sawi a ni.

<><><>

ADVISER TO CM

Adviser to Chief Minister (Handholding) Dr. KC Lalmalsawmzauva chuan kuminah sawthing hralhna a awm har avangin kuthnathawktu ten harsatna an tawh tih a sawi.

Vawiin khan Tuirial SCC atangin Sawthing hralh tur vai liam a ni a, he hunah hian Dr. KC Lalmalsawmzauva chuan, Kumina an harsatna ber chu a rate awm har lutuk leh sawrkarin an la har deuh anga a lan bakah, a rate a tirah an tuk sang lutuk chu a ni, a ti a. Hei vang hian kuthnathawktu te tan sawhthing chawh leh a lin a inruah a, lo nei dan kalphung a buai niin a sawi.

Dr. KC Lalmalsawmzauva chuan sawhthing mamawh hun chu April thla chawhnu lam a ni tih sawiin, mamawh huna pek chhuah tur a awm theih nana inbuatsaih a pawimawh tih sawiin, loneitute chuan sawhthing chawhsa dahthatna lam ngaihtuah dan kawng dap a pawimawh tih a sawi bawk.

Adviser to Chief Minister sawi danin, sawhthing chu kalpui dan hlawm pathum - Bul tan kum leh insiamrem kum (2024-2025); A sawngbawlna uar kum (2026-2027) leh Hmun ngheta chin leh Organic uar zawka kalpui (2027-2028) anga kalpui a nih tur thu a sawi bawk a ni.

<><><>

SIALKAL DEVELOPMENT RANGE

Sialkal Range Development Council (SRDC) Meeting chu an Chairman Pu F. Rodinglana, MLA Lengteng leh Minister of State ni bawk kaihhruaiin a pisaah wawiin khan neih a ni a, he meeting-ah hian Council member-te an tel a ni.

Kum 2026-27 chhunga Sialkal Range hnuai khaw paruk - Mimbung, Hrianghmun, Kawlbem, Teikhang, Selam leh Vaikhawtlang khuaa hmasawna hnathawh tur hrang hrangte leh SRDC area tih hmasawna tur hrang hrangte sawiho

a ni a, Chairman Pu F. Rodingliana chuan Sialkal Range Development Council-in a huam chin tih zauh tuma hmalak mek a nih thu tarlangin tuna khaw ruk bakah hian a chhehvel khua engemaw zat SRDC hnuaiha rin luh tum a nih thu tarlangin chhak tlangdung-a Burma ramri hnaiha awm khua te tih hmasawn kawngah Mizoram Sorkar-in nasa takin ngaihtuahna a seng mek a ti. SRDC area zauh mai bakah dan mumal tak hnuaiha inrelbawlna a awm theihna turin sorkar-in SRDC manual leh inkaihhruaina dan te a ennawn mek a, heng hi tih puitlin a nih hunah chuan SRDC area a huam chin khua ten nasa takin hma an sawn ngei a beisei thu a sawi a ni.

Chairman hian kumthar lamah chuan SRDC Budget pawh tihpun a nih a beisei thu a tarlang bawk a ni.

He SRDC Council meeting-ah hian Chairman Pu F. Rodingliana bakah member dang Pu H. Ginzalala, MLA Champhai North, SDO Civil, Ngopa, Development Officer, SRDC leh Mimbang, Hrianghmun, Kawlbem, Teikhang, Selam leh Vaikhawtlang VCP theuhte an tel a ni.

<><><>

GREEN AG

Chief Secretary Pu Khilli Ram Meena hovin vawiin khan Green - Ag State Steering Committee vawi 9-na chu MINECO-ah an thukhawm a

He meeting ah hian project sum hman tawhna te leh hmasawna hrang hrang te sawi ho niin, line department te nena convergence-a Green Landscape Management Plan (GLMP) kalpui dan tur te sawi ho a ni a, GLIU office Lunglei a thawktu lak belh chungchang te rel a ni a. Committee chuan kum 2026-2027 atana Green-Ag Annual Work Plan leh Budget cheng vbc 6 nuai 98 sing 3 & 1,779 chu a pass bawk a ni.

Green -Ag project hi Food and Agriculture Organization (FAO), Global Environment Facility (GEF) fund a ni a, a tum ber chu India rama loneituten ngelnghet zawk leh ramngaw ti chereu lo zawnga eizawnnna ngelnghet leh hmasawna an neih theih nana hmalak a ni.

He project hi India ramah Madhya Pradesh, Mizoram, Odisha, Rajashthan leh Uttarakhand-ah te kalpui mek niin, kum 2020 khan Mizoram ah Agriculture & Farmers' Welfare hnuaiha tan a ni. He project hian Mamit district khaw 25 leh Lunglei District a khaw 13 huam in, heng khua te hi Dampa Tiger Reserve leh Thorangtlang Wildlife Sanctuary bul hnai khua te an ni.

<><><>

PWD COMMISSIONER

Persons with Disabilities (PwD) Commissioner Pi Vanlaldiki Sailo chuan Kolasib khawpui huamchhunga sorkar hmunhma hrang hrangte tlawhin, rualbanlote tana awlsam zawka luh chhuah theihna an siam dan te a hmunah a enfiah. Vawiin khan DC Office, District Hospital (Civil Hospital), Govt. Kolasib College, St. John's Higher Secondary School leh Home for the Blind School te a tlawh a ni.

Heng hmunhmate a enfiahnaah hian Pi Vanlaldiki Sailo chuan, vohbikte chuan ngaihsak an mamawh bik thu a tarlang a. Pianphunga rualbanloten pangngai taka nun an hman ve theih nan, a tulna apiangah tanpui a ngai hle a ni, a ti. Vawiina fuke kim tha tak te pawh hi nakinah chuan ramtuileilova la awm thei reng an ni a ti a. Sawrkar laipui duh dan angin, sawrkar pisaah te, zirna inah te, Biak In leh vantlang mipui punkhawmna hmunah te rualbanlote tana hman awlsam tur hmunhma kan buatsaih a tul hle a ni, a ti bawk.

Mizoramah Persons with Disabilities Office hmalaknain nikum Feb ni 21 atang khan 'Access Audit' hi neih tan a ni a, District 9 ah he programme hi kalpui tawh niin, Mizoram pumpuiah endikna hi neih chhuah vek tum a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

UTTARAKHAND EX-CM PASSED AWAY

Uttarakhand Chief Minister hlui leh BJP hruaitu senior Bhuvan Chandra Khanduri chu vawiin khan a thi. Kum 91 a upa Pu Khanduri hi hun rei tak damlohna avangin mimal damdawiinah enkawl a ni. Army Major General hlui Khanduri hi tum hnih Uttarakhand Chief minister a ni tawh a. Atal Bihari Vajpayee kaihhrui sawrkarah khan Union Road Transport and Highways Minister a ni tawh bawk a ni. President Droupadi Murmu leh Prime Minister Narendra Modia te chuan Pu Khanduri an ui thu social media kaltlangin an sawi a. President Murmu-i chaun Indian Army-ah chhuanawm taka hna a thawh hnuah mipui rawngbawlin rinawm takin a thawk leh chu fakawm a tih thu a sawi a ni.

Prime Minister Narendra Modia pawhin Bhuvan Chandra Khanduri chuan ram tan a hnathawh chu hriatreng a ni tawh ang a ti.

<><><>

INDIA-NORWAY

Prime Minister Narendra Modia chuan vawiin khan Idnia-Nordic Summit wawi 3-na Oslo khawpuia neihah a tel. Summit ah hian Norway, Sweden, Iceland, Finland leh Denmark hruaitute pawh an tel a. Nordic ramte leh India thawhhona tha zawk siam turin Summit hi neih a ni a. Heng zingah hian technology leh innovation lamte, hmasawmna tluantling leh daihrei neih kawngah te leh khawvel ti chhe tlem zawk chakna thahrui siam kawngah leh digitization lamte sawiho a ni.

India leh Norway te chuan an thawhdunna chu Green Strategic Partnership ah an hlangkai. Nimina Oslo-a Prime Minister Narendra Modia leh Norway PM Jonas

Gahr te an inkawm hnuah inremna hi siam a ni a. Thuchhuah intawm an siamah thawhdunna thar hmang hian Energy thianghlim siam atanga sik leh sa chhe zel siamthatna leh tuipui lam eizawna atanga nungcha leh sik leh sa ti chhe tlema lawng siamna kawngahte an thawhdunna tihlen a ni a.

Prime Minister Modia chuan India-ETFA Trade and Economic Partnership Agreement chu hmasawna leh hausakna tura a ruangam dintu anih thu a sawi a ni.

Hei bakah hian hruaitu pahnihte hian dan hmanga rorelna khawvel leh remna tura inbiakna leh indawrna kalpui uar an thlawp thu an sawi bawk a ni.

